

Uunga siunnersuut: Kommunalbestyrelsinut, nunaqarfinni aqutsisunut ilagiillu sinniisaannut qinersisarnerit pillugit Inatsisartut inatsisaat nr. xx. xx. xxx 2016-imeersoq (siullermik Ivittuut Kommunerisimassaannit nunap immikkoortuanit sinniisussamik qinersisarnerup allanngortinnera).

(Naalakkersuisut Siulittaasuat)

Saqqummiussissut

(Naalakkersuisut Siulittaasuat)

Siullermeerneqarnera

Matumuuna Naalakkersuisut sinnerlugit kommunalbestyrelsinut, nunaqarfinni aqutsisunut ilagiillu sinniisaannut qinersisarneq pillugu Inatsisartut inatsisissaattut siunnersuut saqqummiutissavara.

Naalakkersuisut inatsisissatut siunnersuutip allannguutissatut siunnersuutitut saqqummiunnissaa toqqarsimangilaat, tassa atuisussanut tunngatillugu inatsisip ataatsimoortinnissaa tulluarnepaatut isigineqarmat.

Nunap immikkoortuini sinniisussamik qinersisarneq pillugu aalajangersakkanik inatsimmi allanngortitsisoqarnissaa inatsisissatut siunnersuummi pingaarnertut siunertarineqarpoq, taamaalillunilu Ivittuut Kommuniusimasumi nunap immikkoortuanut sinniisussamik qinersisoqartarnera unitsinneqarluni. Tamanna pillugu malittarisassanik allanngortitsisoqarnissaa pisariaqarpoq, tassami Ivittuut Kommuniani nunap immikkoortuani sinniisussamik qinersisarneq kommuniusimasumi inuit massakut amerlassusaat eqqarsaatigalugu tamat oqartussaaqataanerat eqqarsaatigalugu eqqortutut oqaatigineqarsinnaanngimmat.

Inatsisip pisariaqartumik allanngortinneranut atatillugu inatsimmi kiisalu inatsimmut nasuiaatini pitsanngorsaanissamut oqaatsitsigut erseqqissaassuteqassalluni aamma pissutissaqalersitsivoq. Tamatumani ilaatigut pineqarput qinersisussat allassimaffiannut ilaanermi imaluunniit ilaannginnermi naammagittaalliuuteqarsinnaanermut aalajangersakkat, kiisalu allakkatigut taasisarnermut tunngatillugu aalajangersakkat.

Taamatut oqaaseqarlunga Naalakkersuisut sinnerlugit siunnersuut Inatsisartunut suliassanngortippara.